



Nuuk 11. maj 2010

Inatsisartut suleriaasiat § 36 immikkoortoq 1 naapertorlugu Naalakkersuisunut imaattumik apeqquteqarniarpunga.

Naalakkersuisunut Apeqqut:

1. **Nunatsinni nammineerluta tunisassiarisinnaasavut qanoq isilluta inatsisitigut illersorsinnaavavut?**
2. **Nunatsinni nammineerluta tunisassiatsinnut (aalisakkat eqqarsaatiginagit) Nunatta avataaniit unammillerneqarsinnaanerat inatsisitigut mattukkaluarutsigu Nunatsinnut sutigut ajoqutaasinnaava?**

(Inatsisartuni ilaasorta, Malik Berthelsen Siumut)

Tungavilersuut:

Nunatta imminut aningaasatigut napatinnerulernissaanut aammalu akileraarutitigut isertartut aningaasartuutillu imminnut oqimaaqatigiissinnissaanut suliffiit nutaat minnerunngitsumik tunisassiornermik suliaqartut ullumikkornit amerlanerusut pisariaqartikkivut tamatta nalunngilarput.

Apeqqutima aappaa eqqarsaatigalugu, assersuutigisinnaavarput Nunatsinni Qeqertarsuarmi nammineerlutik imermik tunisassiorneq misileraatitut aallartereerpaat. Taava immitsinnut aperisinnaagaluarput, nunatta avataaniit imermik sooq tikisitsiuaannassaagut nammineerluta imermik naammattumik peqareerluta tunisassiulereerluta?

Assersuutigisinnaavavut sikuliorfik qaqorsaasiorfillu aallartittarnikuugaluarput. Kukkunngikkuma imminut akilersinnaannginneri pissutigalugit matuinnartariaqarnikuupput naak naammattunik Nunatta iluinnaaniluunniit pisisusaqaraluarlutik.

Inatsisitigut illersorneqarnissaat periarfissaqarpat qularinngilara suliffissanik nutaanik pilersitsissagaluartoq aammalu Nunatta avataaniit eqquusortakkatta annikilleriarnerannik kinguneqassasoq.